



UKA16/98

7. oktober 2016

Kelly Berthelsen

**Siunissaq qiviarlugu qanoq iluuseqarluta isumaginnermut ingerlatsinitsinni atorfinitsitsinikkut, ilinniartitsinikkut, pikkorissaaqqinnikkut sulisunillu ilinniarsimasunik annaasaqannginnissarput qulakkeerumallugit 2017-imi ukiakkut ataatsimiinnissami saqqummiunneqartussamik periusissanut iliussissanullu pilersarusiornissaannik Naalakkersuisut peqquneqarnissaannik Inatsisartut aalajangiiffisassaannik siunnersuut.**

Ukiuni makkunani isumaginninnikkut sulisussanik pisariaqartitsineq aatsaat taama angitigilerpoq.

Kommunini pingaartumik meeqqanik sullissisut amigaataapput. Kommunit ilaanni meeqqanut suliassat malinnaaffigineqarsinnaanngillat. Tamatumalu saniatigut atuarfinni meeqqat sanngiinnerusut isumaginninnikkut toqqaannartumik ikiorneqarsinnaanngornissaat ilinniartitsisunit piumasarineqariartuinnarpoq.

Aamma, utoqqaat amerliartorput taakkulu isumannaatsumik pitsaasumillu sullinneqassappata ilinniartitsineq pitsaasoq pisariaqarpoq. Utoqqaat isumagineqarnerat meeqqerinnermit allaavoq, immikkullu ilinniartitsissutigineqartariaqarluni.

Suliffissaaleqisut sulilernissamut piareersimangitsut, tassa isumaginninnikkut ikiorneqaaqqaartariaqartut aamma ikinngillat. Taakku suliffeqarnermut uteqqissinnaassagunik sukumiisumik ikiorneqaaqqaartariaqarput. Ikiunngikkutsigit ataqqinangitsumik inuuneqartillugit perlernaveeqqutissaannik ikiorsertuartassavavut imaluunniit allatut ajornartumik immaqa siusinaartumik pensionisiaqalersittariaqassavavut. Inunnulli taakkununga ataqqinninnerusaaq suliffeqarnermut imminut pilersorfiusumut utertissinnaagutsigit. Tamanna aamma immikkut ilinniartariaqarpoq.

Isumaginninnermi suliassat immikkut ilinniarfigineqartariaqartut, suleriaaseqarfigineqartariaqartut assigiinngitsunillu aningaasaliiffigineqartariaqartut suli amerlanerusut eqqartorneqarsinnaagaluarput. Kisiannili qanorluunniit pisoqaraluarpat assigiissaakkamik siunnerfilersukkamillu periaaseqarnissaq pisariaqarpoq.

Taamaammat siunnersuuteqartup naalakkersuisut peqquneqarnissaannik kaammattuuteqarnera taama oqaaseqarluta ataatsimiititaliami sukumiinerusumik oqaluuserineqarnissaa siunertaralugu ataatsimiititaliamut ingerlateqqitassanngortinneqarnissaa Inuit Ataqatigiinniit siunnersuutigaarput.